

Enn Schuh iss wischdischer als e Kabb

Omm Sunndaachmiddaach hott misch moin Kummbeer Schorsch oogerufe unn hott misch gons uffgereescht gefroochd: Hosdes schunn geheerd vunn unserm Parre? Was hälsden defoo, du bist doch meddem per Du?

Ja, habb isch ze Antwort gewwe, ja, seit moine Lesung „Mensch Münch“, bei der de Parre Jung mettgemachd hott, sinn mir per Du. Awwer Schorsch, was isch doodefoo halle due, werr isch dem Sascha persönlich schreiw.

De Schorsch hott nitt locker gelosse: Awwer...

Nix awwer, saach isch, was isch emm schreiw due gieht aach disch nix oo.

De Schorsch wollt's werklisch wisse. Awwer du host ...

Isch druff: Ja, isch habb ... isch habb heit Nacht enn Ooruf gehabbd unn vunn dem will isch derr jetzt verzähle.

Vumm Parre?, frächt de Schorsch.

Naa, saach isch, vunn moim rechte Schuh unn dess ...

De Schorsch war gons baff. Wie, vumm rechte Schuh?

Ja, saach isch, unn grad dess will isch derr verzähle. Spillt also midde in de Nacht dess Telefon die Oorufmusigg, isch werr wach, gieh onn de Abberat unn frooch: Ei wer issen droo?, unn doo heer isch wie ooner seet: Hier ist ein Schuh von dir.

Wie, enn Schuh vunn mir?

Dreh dich rum, schau hinter dich und du wirst sehen, dass der rechte von deinen Lieblingsschuhen fort ist.

Isch dreh misch also erum unn tatsächlisch, doo hott nor noch de linke Schuh uff dem Platz gestonne, wo isch e paar Stunn vorher moi zwaa Schuh hiegestellt hadd unn saach: Dess gieht doch gar nitt, dass enn Schuh fort iss unn misch oorufe dut.

Doch, und weißt du auch warum ich fort bin unn dich anrufe? Du hast dich vor ein paar Tagen mit dem Schorsch eine ganze Zeitlang über so eine blöde Kappe unterhalten. Ihr habt mit dieser Kappe einen, wie sagt man bei euch?, einen mords Halles gemacht. Du hast sogar darüber geschrieben.

No unn? Jetzt isses noch kalt unn windisch unn doo iss su e Kabb gons wischdisch.

Und wenn es Sommer wird, ist dann die Kappe auch noch wichtig?

Naa, donn nimmi. Heechsdens e Schildkabb weesche dere Sunn

Aber uns Schuhe, uns braucht auch der Schorsch nicht nur im Winter.

Dess iss rischdisch.

Und deswegen bin ich jetzt am Telefon. Also ich und noch viele andere rechte Schuhe verlangen von Dir, dass du einmal über uns schreibst, dass wir wichtiger sind als eine Kappe.

Unn wenn isch nix schreiw due?

Dann kannst du zukünftig mit nur einem Schuh durch die Gegend laufen, weil dann werden alle rechten Schuhe von dir bald verschwunden sein. Schreib drüber. Versprich mir das und ich komme zu dir zurück.

Ja, isch mach dess, versproche! Unn die Unnerhaltung war ze End.

Moins seet die Fraa: Was war heit Nacht los? Du host disch gons schee erumgewälzt.

Isch habb getroomd, saach isch, ebbes gons Bleedes. Ebbes meddem Telefon.

No ja, seet se, Bleedes kimmt vor, wenn merr troome dut. Awwer isch habb heit moie doin rechte Schuh uff de Terrass gefunne, wie kimmden der dort hie?

Eiern Honnes